



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 10

Yangia anidakangma :



Tir Yimiyim



tiryimiyim@aolima



tir yimiyim

TAPAK 8

Tokyo Olympics nung
Carolina masayatsü

Uganda minister ka tepsettsü
merang; par jala asü



VOL. XVIII NO. 228 (ADOK 228) DIMAPUR

RASEMNÜ (WEDNESDAY)

AAMI (JUNE) 02, 2021

₹ 5.00

COVID-19 Nagaland: Nisung 373 taneptsü angur; 174 dak putet

Kohima, June 1, 2021 (TYO): Nagaland nung tanü agi anogo anabuba atongtepa COVID-19 puteter dang nungi taneptsü angur timba liasü.

Mongulbarnü COVID-19 puteta alir nisung 373 tashi taneptsü angur aser nisung 174 dak putet. Tanü puteterem züngsem nisung ajak agi 21,854 kumogo.

May 21, 2021 nisung 225 taneptsü anguba sülen tanü nisung 373 taneptsü angubaji timtiba lir.

"Mongulbarnü nisung 174 dak COVID-19 aliba putet. Parnokji Dimapur nung 58, Mokochung nung 43, Tuensang nung 20, Kohima nung 16, Mon nung 12, Phek nung 10, Wokha nung 8, Zunheboto nung 5 aser Kiphire o Longleng nung kaka (1) lir" ta Health & Family Welfare Minister, S Pangnyu Phom-i metetdaksü.

"Maneni, tanü COVID-19 puteta alir nisung 373 taneptsü angur. Parnokji Kohima nung 208, Mon nung 57, Dimapur nung 36, Tuensang nung 22, Zunheboto nung 17, Phek nung 16, Mokochung nung 10, Longleng nung 5 aser Wokha nung 2 lir" ta paisa ashi.

"Nisung 21,854 rongnungi tanü taneptsü angur züngsema nisung 16,111-i taneptsü nguogo. Iba ajanga COVID-19 nungi taneptsü angur 73.72% kumogo. Tang Nagaland nung nisung 4,725 anepaludar," ta Minister Pangnyu-isa ashi.

"Tang anepalurtem rongnung nisung 257 dak shirangba yimya terara lir, 83 shiranga oxygen agir, 27 ventilator medeni ICU nung

aser 8 ventilator nung anepaludar. Nisung 4,294 dakbo shirangba yimya kecha mali" ta Integrated Disease Surveillance Project atema State Nodal Officer, Dr Nyanthung Kikon-i ashi.

Mongulbarnü COVID-19 puteta alir nisung 9 asüba züngsem tasür ajak agi nisung 385 kumogo. Tanü Dimapur nung nisung 5, Kohima nung 2 aser Kiphire o Phek nung kaka asü. Ajisüaka, tasürtem rongnungi parnok 13 bo tanga tashidak ajanga asü, ta paisa ashi.

Nagaland nung COVID-19 puteter nisung 633 tashi tanga state temi ogo, ta Dr Kikon-isa ashi.

Nagaland nung COVID-19 alitsü akok ta temolung melemi bilemba sample 1,93,465 tendangogo. RT-PCR ajanga sample 89,769, TrueNat ajanga sample 55,909 aser Rapid Antigen Test ajanga sample 47,787 tendang, ta Dr Kikon-isa metetdaksü.

"Hombar tashi nung Nagaland nung nisung 2,26,816 nem COVID-19 vaccine indang dose 2,80,967 agütsüogo" ta State Immunization Officer, Dr Ritu Thurr-ia metetdaksü.

Vaccine agirtemji frontline workers 58,718, healthcare workers 15,544, arishi kum 45 ser temapur 1,22,938 aser arishi kum 18 nungi 44 tsüngda alir 29,616 lir, ta paisa ashi.

Vaccine agirtem rongnungi nisung 54,151-i vaccine dose anaprong agiogo. Parnokji frontline workers 27,982, healthcare workers 10,190 aser arishi kum 45 ser temapur 15,978 lir, ta Dr Thurr-isa ashi.

Dimapur nung jenjang atuba azüoktsüla: WSYF

Dimapur, June 1 (TYO): Nagaland nung total lockdown asüba nung tajangzük agia Dimapur nung shishilembar aikati kechisarena nung jenjang tur ayoker ta Western Sümi Youth Front (WSYF)-i metetdaksü.

Iba ajanga sensakertemi timtem ajurur, ta Media Cell, WSYF sangdong ka nung metetdaksü.

"Alo, dal, entsü amala kanga nüngdakba ajak nung jenjang tur ayoker. Sorkar aser shishilembaba dak sendakba teloktemi tetuyuba agüjaka,

jenjang atuba ya parnok hao ta maliba lir. Ketdangpurtemi tetuyuba agütsüba dak alia shishilembadak jenjang atuba mita reprangtsü mapa tenzüka lir mali" ta parnokisa asüngdang.

Dimapur district administration aser Dimapur Municipal Council-i June 11, 2021 matongdang shishilembadak jenjang reprangshimtsü metetdaksür. Iba mapa ya meinyaktetra WSYF-i public mechi nung volunteers lemezüka mita anüksü, ta WSYF-isa metetdaksüogo.

DIMAPUR NUNG JENJANG TUR AYOKBA KAR:

Jenjang tejenba	Talila Atuba
1. Mustard oil (Engine) Rs 130 per L	Rs 180 per L
2. Rice (Parimol) Rs 900 per bag	Rs 1170 per bag
3. Rice (Nice) Rs 1200 per bag	Rs 1450 per bag
4. Naga dal Rs 50-60 per kg	Rs 90 per kg

Dimapur nung Aortemi Covid mozü ki 7 nung chiyongtsü agütsür



June 1, 2021 nü Dimapur Area Ao Baptist Churches aser Ao Civil Societies Co-Ordination Committee on Covid-19 nungi züngsemtemi mozü kidang chiyongtsü agütsüdag agiba noksa angur. (Dimapur, June 1)

Dimapur, June 01 (TYO) : Dimapur nung Covid mozü kitem nung inyakterem tasüba wara tongpang tulu nung nokdaka yur shi temang aser tanüla nung meluladaksüi tashi aser tasü itshidaksütsü nükjidong nung, Dimapur Area Ao Baptist Churches & Ao Civil Societies purtem telongjemi parnok inyakba mozü kitem ajak tonga orr sarasadem mapang agüja chiyongtsü agütsüba sentong ka tenzüko.

"Tang asen lima Covid-19 wara tongpang nung nüngdakba kiojen aser tanga nüngdak osettembo agütsütettsü saka mozü kidang shirangertem mapa meinyaktettsüsa kumra, ibajiang ajak atema lendong tulu asütsü, anungji iba timtemji reprangteta sarasadem den mozü kidang inyakterem temang aser tanüla nung tashi aser tasü itdakja yariteptsü nüngdakba reprangteta, onoki Dimapur nung

aliba Covid mozü kitem aser Covid Care Center ajak nung mapang agi melaba tashika chiyongtsü agütsütsü lemtetogo," ta tanü Dimapur Area Ao Baptist Churches & Ao Civil Societies Co-Ordination Committee on Covid-19 sangdong ka ajanga metetdaksüogo.

Tang tashi nung Dimapur nung Covid Hospital-temji District Civil Hospital den private mozü ki trok lir. Itemji Dimapur District Hospital, CIHSR (Referral Hospital), Zion Hospital, Faith Hospital, Eden Medical Center, Olive Christian Hospital, Nikos Hospital-tem lir. Item denji ano Chief Medical Office nung inyakterem aser Chumoukedima aser Medziphema nung Covid Care Center lapoka lir.

Item Covid mozü kidang inyakterem nem chiyongtsü agütsüba sentong ya CIHSR (Referral Hospital) nung May 29

nü tenzüko aser tanü June ka nü tanüngba mozü kitem den CMO aser Covid Care Center-tem nung agütsüogo. Chiyongtsü ya Dimapur nung aliba Ao arogo tem lemsar soruchioker aser sannükertemi mozü kitem tashiji oagi sarasadem mapang tajung agir chiyongdaksür. Tang tashi nung soruchioka agütsürtemji Choumukedima, Diphupar, Aoyimti, Padumphukri, East Dimapur, Nükmen aser Aoyimkum nung aliba Ao Baptist arogo tem liasü. Parnok arogo tem ajak dang pelaba kasa sangdong ajanga DAABC & ACSCC lenirtemi metetdaksüogo.

Kasa Dimapur nung Ao arogo tem aser lokti tentettem telongjem yagi taküim 2020 kuma Quarantine Center asem tashi nung nisung 245 anogo 20 nü tashi nüngdak ajak peria agja anepalur külenang ano Dimapur District Hopsital kima Multi Public Utility Center ka yangluja lir. Iba tang Vaccination center tongtibang ka kuma amshidagi.

Item ajak ya kija, kibong, arogo aser lokti tentettemi temulunger tenla agütsüba ajanga inyaker, anungji ano maneni Tsüngrem dang sarasadema tenladaksüner ta DAABC & ACSCC nung tayonger Wb.Supu Jamir aser tezülur Wb.Imti Jamir nati ka sangdong ajanga mepishia metetdaksüogo.

Ano maneni June 3 nüa Covid mozü kitem, CCC aser CMO office-tem nung inyaker Health Worker-tem nem chiyongtsü agütsütsü atema Dimapur Watsü telongjem aser arogo temi soruchioktsü renema lir ta angazüker.

Class 12 CBSE Board tatidang magitsü

New Delhi, June 1, 2021 (Agencies): Mongulbarnü Centre sorkari Class 12 kaketshirtem indang CBSE Board examination athiba osang metetdaksüogo.

Tanü Prime Minister Narendra Modi menden ser senden ka amendang iba teletetba agi.

Senden nung ketdangsürtemi CBSE indang Class XII Board exams atema state sorkartemi anir sendaka alirtemi tebilemba lemsatepbatem metetdaksü.

COVID indang tensa nung ajemdaker taküm asoshi Class XII Board Exams magitsü lemtet. Senden nungsa CBSE-i mapang lemsar class XII kaketshirtem indang results renemtsü teletetba agi.

"Class 12 CBSE Exams indang teletetba ya kaketshirtem dak rangloker agiba lir, ta Prime Minister Modi-i ashi.

COVID-19 ajanga academic calendar nung kongshio go aser Board Exams agitsü ta osang sangoktsüba ajanga kaketshirtem, tsüraburtem aser tesayurtem shisabuludaksür," ta Modi-isa metetdaksü.

Linük nung Covid tensa tamajung ajurua lir. Linük nung COVID-19 putetba ajema aknung COVID-19 putetba ajema akümer aser state kar nung micro-containment aser kar nung lockdown agüja azüoktsü meranger, ta Modi-isa ashi.

"Iba ama tensa ka nung kaketshirtem nem tatidang magütsü dak tsütsü la. Kaketshirtem temang anema ayutsü atema temolung agütsütsüla aser iba nung timtem kecha bentsür marutsüla. Tanü ama tensa ka nung tatidang agiba ajanga asen lanurtem temang nung timtem ajurutsü ana nung lir" ta paisa shisem.

Yaküm ama kaketshir kari tatidang agütsünüra, CBSE-i tensa tajungba akümdang iba maongka agütsütsü atema tanü senden nungsa teletetba agiogo.

Iba onük atema Centre-i Supreme Court dang mapang meshizüka liasü aser iba ken o ya June 3 nü angadangtsü lateta lir.

May 23, 2021 nü senden ka amendang CBSE-i July 15 aser August 26 tsüngda tatidangtem agitsü shidanga liasü.

"India kübok state aikati tatidang agitsü molunga lir," iba senden amenba sülen Union Education Minister Ramesh Pokhriyal-i metetdakja liasü.

Minister Pokhriyal ya Mongulbarnü AIIMS hospital, Delhi nung anepalutsü aniokogo. Pa dak Covid puteta anepaluba sülen ano temang mejungi kümer lir.

Tango junga mesashitetba, teku ashiba, aketba aser temang metaba timtem lira yakta doctor bushiang.



Dy. CM-i Bhandari nung frontline worker den senden amen



June 1, 2021 nü Dy. CM, Y Patton aser ketdangsertemi Dr. Motsuo Memorial District Hospital, Wokha semdangba noksa nung angur (DPRO Wokha).

Dimapur, Aami/June 01 (TYO): Deputy Chief Minister, Y. Patton-i Community Health Center (CHC) Bhandari nung June 1, 2021 nü frontline worker aser Bhandari Block Task Force züngsemtem den COVID-19 atema senden ka mena liasü.

Danga state den arrtsüa aliba sub-division nung COVID-19 tensa tejangja metetba sülen, state arrtsü nung aliba ajanga Bhandari sub-division ya tetsükdaktsü balala ajuruba tesem ka süaka COVID-19 tashidak ketdangsüba aser azüokba tsütsü block tajungtiba rongnung ka lir, ta Deputy Chief Minister-i ashi aser frontline worker temi meranga inyakba atema pelaba lemsatap.

COVID-19 tashidak wara den raraba aser nüburtem nem health safety service agütsüba nung frontline worker yaritsü metetdaktsüba den külemi parnok dang mapang shidak nung peritsütsü atema parnok nüngdakba tem metetdaktsütsü ashi.

Tang ama timtem mapang Deputy Chief Minister-i Bhandari nung aliba nüburtem asoshi alakteta bilema teyari agütsüba atema Advisor IT& Communication, Science & Technology and NRE, Mhonlumo Kikon-i pelaba lemsatapa liasü.

Tanü tashinung nisung 2,000 shi COVID-19 mozü agiogo, ta Senior Medical Officer (SMO) CHC, Bhandari, Dr. Caroline-i

iba senden nung ashi. Laisa Sub-division kübok tongtipang tesemtem nung tapi agi COVID-19 tashidak tendanga jajaogo aser tang tashi COVID-19 ketdangsüba tsütsüa akaba yari tajungtiba nung ketdangsüa arur, ta lai metetdaktsü.

Tashidak wara den raratsü atema nüngdaka aliba ama senotsü den osettsüset balala tenlaba atema lai tesemdanger tem dang pelaba lemsatapa liasü.

Deputy Chief Minister ya meina Advisor, Horticulture, Mhathung Yanthan; MLA Dr. Chumben Murry; Deputy Commissioner, Wokha; SP & CMO Wokha aser dangartem oa liasü.

Kohima nung World No Tobacco Day among

Dimapur, June 01, 2021 (TYO): May 31, 2021 nü Directorate of Health & Family Welfare, Kohima nung World No Tobacco Day mongogo.

Iba sentong nung mendenji Consultant, Linoka Awomi liasü aser Director (Family Welfare), Dr. Thorsie Katiry-i tetushi süa jaoker ka ama shilem agi.

Iba wara mapang ketdangsürtemi tangar dang tatishitsü tajung sayua moko

nungi pila alitsü merangang, ta Dr. Katiry-i ashi.

Sentong nung State Nodal Officer (NTCP), Dr C. Tetseo-i o jembidang nisungtemi mokozü madokba moko ajanga lendong bentsür aruba atema shishia mebilemer ta ashi.

"Gutka aser Pan masala nung 'magnesium carbonate' enoker aser iba ya anti-caking agent ama amshir. Nisungtemi iba ya anogoshia talila achiba ajanga temang nung timtem

tulu adoker" ta Dr. Tetseo-i ashi.

"Tanga state aika nung 'magnesium carbonate' amshiba atema pan masala brands noktanga lir" ta paisa shisem.

Iba sentong nung Director (Health), Dr Vikato Kinimi-i "Apilot Study on Cost Expenditure of Tobacco Consumption in Nagaland" ta ser kakat ka sayatsü.

Iba kakat ya State Tobacco Control Cell, Nagaland ajanga adokba lir.

CCC tenzüksü atema Tuensang nung senden amen



June 1, 2021 nü Tuensang Task Force COVID-19 senden CBLT Conference hall nung nung senden amenba noksa nung angur. (IA Tuensang)

Dimapur, Aami/June 01 (TYO): Tuensang District Task Force for COVID-19 pur senden ka June 1, 2021 nü CBLT Conference Hall nung senden ka mena Covid Care Center (CCC) Tuensang tenzüksü atema jembia liasü.

Iba senden nungya Chang Baptist Lashong Thangyen, Eleutheros Christian Society, tribal hoho, all ward union, TCC&I, pastors union nungi teshimtet nübutem den CMO, MS aser police tem dena liasü. Senden nung Rev. Achu

ajanga Government Polytechnic Sedem nung COVID Care Center amenoktsü atema renemshiba indang osang metetdaktsü.

Tuensang atema Government Polytechnic Sedem nung CCC ketdangsütsü atema iba senden nung management team ka shimteta liasü aser district nung COVID-19 tashidak menatapa aoba azüoktsü mechi COVID-19 putetaka timtem magütsürtema ajak iba CCC nung anepalutsü senden nung

lemtet.

Senden nung iba CCC anepalutsü atema senotsü nüngdakba indang jembi aser tangateter dang nungi senotsü teyari meshitsü atema management team nem nungloktsü.

Maneni management team dang Covid Care Center Tuensang atema senotsü teyari meshia Deputy Commissioner, Tuensang ajanga High Power Committee, Nagaland dangi shidi zülutsü atema senden nungsa jembia liasü.

Tesayurtem National Award atema sangdonger

Dimapur, Aami/June 01 (TYO): Tesayurtemi pei sasa online ajanga 'National Awards For Teachers' atema nominate asütsü atema web portal <http://nationalawardsforteachers.education.gov.in> ya June 1, 2021 nü lepokogo aser temsüa aliba tesayurtemi pei sasa nomination agütsütsü anogoji June 20, 2021 tatem asütsü, ta Directorate of School Education sangdong ka ajanga metetdaktsü.

Iba Award atema tesayurtem temsüa alitsü asoshi item conditions ya alitsüla:

Tsünglanglen agüja aliba telemsa kübok tejangja Primary/Middle/High/Higher Secondary School tem nung inyakba School Teachers aser Heads of School tem:

- a. State Govt./UTs Administration ajanga lapokba school tem, local bodies temi lapokba school tem, State Govt. aser UT Administration ajanga yariba school tem.

- b. Central Govt. School tem, tatishitsü agi Kendriya Vidyalayas (KVs), Jawahar Navodaya Vidyalayas (JNVs), Ministry of Defence (MoD) ajanga lapokba Sainik School tem, Atomic Energy Education Society (AEES) ajanga lapokba school tem aser Ministry of Tribal Affairs ajanga lapokba Eklavya Model Residential Schools (EMRS) tem.

- c. Central Board of Secondary Education (CBSE) (Tekalen (a) aser (b) nung shia aliba dak alaka) nung affiliate süa aliba school tem.

- d. Council for Indian Schools Certificate Examination (CISCE) (Other than those at Tekalen (a), (b) aser (c) nung shia aliba dak alaka) nung affiliate süa aliba school tem.

(Maneni tapak 3 nung...)

Chuchuyimlang nung GSPK ka semzükögo



Guru Chubatozung (achichilen nungi asembuba), Ao Sanen Pongen (abelen nungi asembuba), aser T. Lima Pastor (achichilen nungi anabuba) nungertem Shishyas/pupils (mena aliba) pezü den külemi tangokba noksa ka yangi angur.

Dimapur, Aami/June 01 (TYO): Ao Naga nunger sobaliba ken aser tsüngsang wazüka ayutsü mechi Mongulbarnü Mokokchung kübok Chuchuyimlang nung Guru Shishya Parampara Kendra (GSPK) ka semzüka liasü.

Iba reju semzüka sentong tenzüka jembiba mapang, Ministry of Culture, Government of India ajanga India linük tesem ajungalen tribal kin indang sobaliba aser yimsü wazüka ayutsü aser tarutsü putu nem sobaliba aser yimsü jenjang angazükdaktsütsü nükla nung Guru Shishya Parampara (centre for learning culture) scheme tenzüka senotsü teyari agütsüba atema pelar, ta Ao Sanen Pongen, Chairman, Chuchuyimlang Village Council ajanga ashi.

Kenten-menü ya kar document ajanga wazüka yuteter, saka tetsü-tebou ken aser tsüngsang tem wazüka ayutsü aser sempet tajung aliba lanur nem angazükdaktsütsü asoshi Kendras/centres lapoktsü ya kanga tongtipang, ta pai ashi.

Lanu putu atema iba amala centre ya awareness angudak tesem tongtipang asütsü, kechiaser iba amala awareness centre tem ya melira sobaliba jenjang samatsü tejangja, ta pai

ashi. Sobaliba balala nungi süaka tanü-asüng globalized society ka nung alir asünung, nüburtem aser sobaliba balala ya ka amai akumtsü akok, anungji Guru Shishya Parampara Kendra ama centre lapokba ya kanga tongtipang lir, ta Pongen-i ashi.

Pai Guru Chubatozung aser par telok dang Ministry of Culture indang mangdang nung aliba ama Ao'er sobaliba ken aser tsüngsang tem wazüka ayutsü aser ajungkettsü atema meranga inyaktsü ajungshia liasü.

Aor sobaliba wazüka ayutsü aser lanurtem nem training agütsütsü atema GSPK amenoktsü asoshi Ministry-i North East Zone Cultural Centre, Dimapur ajanga Guru Chubatozung ya tawa Guru (tesayur) ka ama shimteta liasü.

Pa ya Tsukjemtoshi-i Accompanist ka ama yaritsü aser session ka nung Shishyas (disciples/students) nem training agütsütsü.

Iba Guru Shishya Parampara Kendra semzüka sentong tenzüka T. Lima Pastor ajanga sarasadem, Guru Chubatozung ajanga tarur pela agizükba o jembi aser Accompanist Tsukjemtoshi ajanga iba GSPK centre yimya aser inyakyim indang lemsatapa liasü.

Lt Gen Nair-i Assam Rifles nung Director General inyaker



Lt Gen Nair

Guwahati, June 1, 2021 (Agencies): Mongulbarnü Lieutenant General Pradeep Chandran Nair-i Assam Rifles nung Director General 21 buba inyaksü tenzükogo.

Lt Gen Nair-i Assam Rifles aser Northeast nung mapang talangka inyaka arur.

Taoba mapang pai Assam Rifles nung Inspector General aser Company Commander inyaker aser Assam Rifles battalions nunga Brigade Commander inyakogo.

General Officer Lt Gen Nair ya 1985 küm Sikh Regiment nung anio.

Pa ya Sainik School Satara, National Defence Academy, Defence Services Staff College, College of Defence

Management aser Indian Institute of Public Administration nung azü.

Lt Gen Nair-i rara nung aika ajangshia aruogo aser ibaji pai Siachen Glacier aser Assam nung battalion (18 Sikh) Commander inyakba ajanga lir.

"Northeast nung pai Manipur o Sikkim nung Company Commander, Assam nung Battalion Commander, Manipur nung Brigade Commander aser Nagaland nung Inspector General of Assam Rifles inyakogo" ta Assam Rifles sangdong ka nung metetdaksü.

Lt Gen Nair-i Infantry School, Mhow, Indian Military Training Team, Bhutan nung instructor onyakogo aser Defence Services Staff College

nunga Directing Staff liasü.

Army Headquarters nunga pai Colonel, Major General aser Lieutenant General inyakogo. Maharashtra, Gujarat and Goa Area aser Defence Intelligence Agency nung Brigadier General Staff inyak.

Army Headquarters nung pai tesüsaba mapa inyakbaji Director General Recruiting liasü aser iba ya Indian Army nung officers aser jawans anio.

Nagaland nung Inspector General Assam Rifles (North) inyakdang pa nem Ati Vishisht Seva Medal agütsü, Manipur nung Brigade ketdangsüdang Yudh Seva Medal agizük aser asemben tashi Chief of Army Staff Commendation Card nguogo.

Manipuri actor kati Punjab nung NE nunger nem vaccine agütsür



Manipuri actor kati Punjab nung NE nunger nem vaccine agütsür

Imphal, June 1, 2021 (Agencies): Chandigarh, Panchkula aser Mohali nung aliba Northeast nunger asoshi Manipur R.K Sushant (Sushanta Rajkumar)-i vaccine agütsüba maparen ka tenzüksüogo.

Deobarnü Punjab kübok item tesemtem nung aliba Northeast nungertemi SOPs sülen anidaka vaccination drive nung shilem agiogo.

R.K Sushant ya tesüiba küm 20 shi ka par tsüraburtem den Punjab nung liyonga arur aser pai Northeast India nungi pa sülen anidaktertem sendaktepa iba vaccination

drive tenzük.

"Kü indang YouTube channel nung ni ozü kibong vaccine agiba osang aser iba nung tetsübutüsü kecha mali ta lemsatepba sülen, kü sülen anidaktertem aser temeimertem nungi osang balala aru" ta pai ashi.

"Parnoki kü dang koba tesem nung vaccine agitsü ta asüngdang aser karbo vaccine agitsü atema khuret ajuruba lemsatep. Iba jagi ni ozü kinungertem aser medemertem den jembi aser Northeast nungi adianutem yaritsü molungtet" ta R.K Sushant-isa metetdaksü.

Chandigarh nung pa aliba kidang SOPs sülen anidakba vaccination drive takok ngua agi. Iba nung doctor tem aser Punjab Health Department nungi medical nisungtemi shilem agi.

Nisung 90 temaui Covid-19 indnag vaccine agiba nungi Manipur, Mizoram, Nagaland, Arunachal aser Assam nungi nisung 40 dena liasü. Mezüngbuba shilem nung arishi küm 18-45 tsüngda alirtem nem vaccine agütsü.

R.K Sushant-isa Health Department den yaritepba tanüngba nisungtem nem vaccine agütsütsü.

Covid-19 puteta alir mashisa nurse ka asüba atema ola adoker

Shillong, June 1, 2021 (Agencies): Meghalaya nung ita trok tanur bena aliba nurse ka Covid-19 ajanga asüba atema nübertemi ola adoker.

Iba tetsürta ya Manisha Turnia aser la ya Shillong nung aliba Ganesh Das Hospital nung staff nurse liasü. Deobarnü la Covid-19 agi timtema asü.

Meghalaya sorkari mashisa tetsürtem mapa meinyakdaksütsü atema tetuyuba agüja lir saka Ganesh Das Hospital ketdangsürtemi la nem mapa inyakdaksüba atema nisungtemi aitsür.

May 17, 2021 nü Meghalaya sorkari COVID-19 lockdown mapang mashisa tetsürtem mapa meinyaksü atema sangdong ka agüja lir.

Ganesh Das Hospital ketdangsürtem dang nungi mashisa staff nurse ka mapa inyakdaksüba aser asüba indang osang tejangja meshiogo ta Health minister AL Hek-i ashi.

Ajisüaka, Health Services (MI) Director, Dr. Aman Warr-ibo Covid-19 puteta staff nurse ji Covid mapa inyaksü lemsüka maliasü ta ashi.

COVID-19 anema rara nung onok külemi inyaker Nurse Manisha Turnia asüba atema sasar, ta Trained Nurses' Association of India, (Meghalaya State Branch)-ia metetdaksüogo.

Külen, Congress MLA Ampareen Lyngdoh-ibo iba tatalokba bushisüngdangtsü takhangba agütsüogo.

BJP züngsemtemi Tripura nung journalist ki amak

Agartala, June 1, 2021 (Agencies): Bharatiya Janata Party (BJP) züngsem kari Agartala nung senior journalist Samir Dhar'er ki amak.

Honibar aonung BJP züngsemtem jagi kotari bener iba tesemi ao aser Samir Dhar'er ki jara raksatsü.

Dhar ya Assembly of Journalists (AoJ) nung vice president aser Aaj Kaal atema Tripura correspondent lir. Aaj Kaal ya Kolkata nungi adokba Bengali newspaper lir.

Tripura nung BJP sorkar akümba sülen 2018 nungi tang agi tasembenbuba Dhar'ar ki makogo.

"BJP party züngsemtemi

Honibar aonung 9:00 ako meta kotari amer arua amak. Parnoki Samir Dhar'er ki jara raksatsü aser o tamajung shia pa merenshi" ta AoJ-i sangdong ka nung metetdaksü.

"Parnok ozü ki telungi maittet saka jara raksatsü. Parnoki ni amokmeren aser o tamajung ashi" ta Dhar-ia ashi. Pa ya Tripura nung Left front convener Bijan Dhar tenu lir.

BJP züngsemtemi ozü kidanger indang ki dena amak, ta Dhar-isa metetdaksü.

Yaküm chief minister Biplab Kumar Deb-i sentong ka nung media amokmerenba sülen journalist tem kanga amaker, ta Assembly of Journalists-isa metetdaksü.

Meghalaya nung COVID Care Centre nem mamatzü agütsü

Shillong, June 1, 2021 (Agencies): Meghalaya nung dairy farms aser teloktemi World Milk Day nung COVID-19 Care Centre nem mamatzü tenla agütsütsü telemtetba agiogo.

COVID-19 Care Centre nung amongertem temang tshi itdaksütsü atema mamatzü agütsütsü ta parnoki ashi.

Tanep Meghalaya chief minister Conrad Sangma-i West Haro Hills district kübok Tura nung mamatzü tenla agütsüba noksa kar sayaogo.

"Taküm World Milk Day balaka amonger. KVK ICAR

India, NARI, Shillong aser nija private dairy teloktemi Tura nung Corona Care Centre tem aser Covid Wards nung mamatzü tenlaogo. Parnoki molungsoa tenla atema kanga pelar" ta Conrad-i ashi.

World Milk Day ya 2001 küm United Nations kübok Food and Agriculture Organisation (FAO)-i amongtsü tenzük. Alima nung mamatzü ya kanga dang tongtipang chiyungtsü ka ta ajitettsü aser dairy sector ajungkettsü nükjidong nung kümshia June 1 nü iba anogo amonger.

Tesayurtem National Award...

(TAPAK 2 NUNGI...)

- Temetetsü:**
- Mapa nungi anener aliba tesayurtem iba sempet atema metemsü saka calendar year shilem ka tenzük alir (tajemba agi ita pezü, tetetzü National Award dak sendakba küm April 30 tashi) temi danga condition tem ajak abensa lira nomination agütsütsü akok.
 - Item sempet atema Educational Administrators, Inspectors of Education, aser Training Institute nung Staff tem metemsü.
 - Tesayur/Headmaster ya

- tuition agir masütsüla.
- Regular Teachers aser Heads of Schools tem dang iba semtep atema temsüa lir.
- Contract nung inyakba tesayur aser Shiksha Mitras madentsü.
- Tesayur shirnoki shisaliok tajungba kumdaksütsü atema bendanga agüja inyaker parnoki sayuba tanurtem takum tajungba melenshitsü, parnoki latetja aliba anogo tashinung self-nominations agütsütsü ajungshir. Maneni tali tejangjaba metettsü asoshi agüja aliba web portal nunga angutsü, ta ashi



TIR YIMYIM

YIMOBILEM (EDITORIAL)

DIMAPUR RASEMNÜ, AAMI (JUNE) 02, 2021

Arogotemi junga inyaker

Yisu alima nung alidang yipru mopong agi amokmerena alirtem kümzükba aser yasete alirtem tebok sünga chiyongdaksüba den kasa, tanü alima nung tashidak wara tesashi agi tetsübutüka amokmerendang, government dak dang imlaa melii nisungtem tasüba wara aser ayatzüra nungi kümzüksü asoshi tesem balala nung, talisa, Ao arogotemi shilem tajung agiba angudang pelar aser temulung anisungzüker. Tangar limatemji khen toktsür asen lima ama nungbo, tang ama lendong tulu agi menepdang, government dak dang imlar ali nungbo ajak akoksatsü, anungji nübertemi peisasa yimkong nungdak reprangteta yariteptsüba kanga rongdak nungdak akümer. Aji oda, tang ama lendong tulu nungi nübertem taküm kümzüksü asoshi arogoi sarasadem dang masü saka kiojen, senotsü aser chiyongtsü tenla agüja yaritepbaji Tsüngremi nübertem taküm kümzüksü asoshi kotak tenyarterem yokba asütsü. Atangji, asenok arogotemi dang masü saka tangar tanga tamangba yimsü amangertemia nübertem tasüba tashidak wara nungi kümzüksü asoshi shilem tajung agiba angur. Item rongnung temerangtiba aser temeim mapa tajungtiba aser tulutiba inyakba tamanger telok kaji, Sikh nungertem ya lir. Sikh nungertem yabo kong lidir, yangji parnok tekülemba ki Gurdwara nung parnok asoshi dang masü saka sensaker aser timtemer shirnok chiyongtsü maka timtemer, parnok asoshi dena soruchioktsü atema soruchiokdak tesem balaka mesemteta mimong mesemer. Iba tesem dangji Langar ta ajar. Langar tetezü Punjabi nung oshi nung lokti asoshi soruchiokdak. Iba Langar nung soruchiokertemjia parnok rongnungisa nübo angati agüja soruchioktsü purtem ayur. Atangji, Punjabi nungertemi shi ango achir saka Langar nungbo shi ango mamshir, anungji chi, roti, daal aser alu nung züsentetba aonsutsütem bendena aon sor anogo shia sensakertem chiyongdaksür. Aji oda, alima nung daal aon rongnung Langar nung anguba daal aonsa tajungba ta otsü kuma jembiba asenoki angashitsü aser aji shitak lir. Iba Langar nung mashi kin aser mashi tamangba yimsü amangertem arua chiyongtsü akok. Parnoki Langar nung chiyongtsü atema kin kidong, tamangba yimsü, tulu tilar aser tetsür tebur kecha mashishir. Aji oda, Dimapur nunga Gurudwara ka lir aser yangji Sikh nungertemi anogo shia nisungtem nem tzü tajung tadaktsür aser chiyongtsüa agütsür. Tang Covid-19 wara tongpang nung yaa, parnok anogo shia District Covid Hospital nung shiranger anükertem nem anepdang nungi aonung tashi süngo aser chiyongtsü agütsür. Iba ama temeim mapa tajung inyakba reprangteta pelaba tamaitü Dimapur Ao Baptist Arogoia parnok nem sen lakh ka tenla agütsüogo. Iba denji tang nungi Dimapur nung Covid Hospital tenet den CMO aser Covid Care Center-tem nung inyaker Health Worker-tem nem anogo shia Dimapur nung aliba Ao Baptist Arogotem aser Aor lokti tentettem longjemmer chiyongtsü agütsü tenzükogo. Kasaji Mokochung nunga Mokochung Town Baptist Arogoi Covid Care Center nung amangertem asoshi soruchioktsü tenzükogo. Tang ya teshirangbo meshiranger saka Covid putet mesüra tera shiranger ta asürtembo mozü kidang memongdaksüi pei kidang kinungertem den memeyoktepi takdang balaka nung lia atatsü asoshi yoker, kechiyong item ajakji mozü kidang aniok nung masemtsü aser mozü kidang amongtsüa menügdaker. Ibaji kodang bilemdangdir shitak dang, saka nisung ajak ka amato masü, anungji nisung aika pei kidang kinungertem den takdang balaka nung alitsüsa kiojen maka, anungji meyoktepa alitsüsa akümer. Timtem lendongji yangji keta lir. Ibaji repangteta parnokji Covid Care Center balaka mesemteta yangji lidaktsütsü aser parnok nemji chiyongtsü agütsütsü MTBA-i anepalutetba jagi memeteti asen nübertem tasü wara nungi kümzüksü. Iba amaji Kohima nungbo Kohima Ao Baptist Arogoi doctor aser nurse-tem Covid mozü kidang nungi parnok kidangi indangindanga moutetter asünungji, parnok alitsü atema arogo ki agüja lir. Iba amaji Delhi Ao arogoia Delhi nung dang masü saka Impur Christian Hospital nung tashi Covid agi shirangertem anepalutsü asoshi Oxygen Concentrators tenla yokdagi. Aji oda, ABAM-ia shilem agiba asenoki angashiogo. Tanü yangi Covid tashidak agi tonga aliba tesemtem nung Covid mozü kitem lapoka alidak aser arogotemi yariba mapa kar lemsateper dang ashi, ano iba ama mesükba teyari mapatem aisü nung asenok Ao arogotemi shilem agidagi. Atangji, ibai arogo asoshi alima nung temeim mapa inyaksü tajungtiba mapangji lir. Iba temeim jagi Tsüngrem temeim kuma nisung aika tang Covid wara mapang ya shi aser tanüla na prongla kümzüksü teimla tulu lir.

OLEMSABANG

IBA LIMA NUNG TEBANGKATSÜ ASER MENÜNÜTSÜ
AKETBA TAPU ANA ASEM TASHI MANENI ATALOKYONGA
AOR, ITEMJI TATSÜ AGI YAMAI AGÜTSÜR:-

~ R. Imkong Lkr, Mangimen

- No. 1: Nisungtem rongnung kari mapabo meinyakner, saka achiajemtsübo tajung tang chiner, aserbo abensüoshia tajung tang sübunüba takütem kar angur. Saka itemji kecha nunga tatongngokdak makatsü.
- No. 2: Mapa tajung inyaksübo kecha memetet, saka tamajung inyaksü nungbo kanga mongin kar angur.
- No. 3: Nisungtem rongnung karbo awashibo memetet, saka salepsaritsü nungbo shilem kanga junga agitetba nisung kar alir.
- No. 4: Nisungtem rongnung karibo pei nisung yaritsübo memetet, saka tangar nisung yaritsü nungbo temulung kanga agütsüba angur.
- No. 5: Nisung karbo tenarong agi junga mangashir ser nung, tenük agibo junga majitetba kar alir, parnokji shisatsü nunbo tangartem memenep ser nung, ain adoktsü nungbo kanga tekara alir. Koda jangratemtsü takümtet lir.
- No. 6: Nisung karbo lalushibongtsü nungbo kanga tekara alir, saka alirongsen bushitsü nungbo tukulok mait alir.
- No. 7: Student-tem rongnung karibo lesson meranga mazünger ser nung, result adokdangbo takok tajung nungang pass sünüba nübu kar alir. Parnok dakji ak mesen masü, saka azümesen tanela alir.
- No.8: Nisung karbo mapa inyaksübo mashi ser nung, teraksatsübo kanga junga metetba shisatsü tena alir.
- No. 9: Karbo nisungbo tajung ser nung tamagitsü mapabo kanga junga sangrateta inyaktetba nisung kar alir.
- No. 10: Nisung karbo tereprangtsü nung suwar ama liaka, item dangji nabo tepur tajunga ta ashinungang pelaba nisung kar alir.
- No. 11: Nisung karibo sen-o-tsübo aa maruteter ser nung, taginütsübo onsara adokba taküm kar alir.
- No.12: Nisung karbo tagitarutsübo kecha memetet ser nung, tangar menüshishidaktsütsübo kanga junga jembiteter kar alir. (Jester)
- No.13: Nisung kari tulu aser takar jilobo kanga junga iteter ser nung, pei kidangbo kecha maka tazungla alir.
- No.14: Iba lima nung nisung karbo makatsü kecha maka, saka karbo takatsü kecha maka ta liyonga odaki (odagi). Anapronglaji tangatsübo kanga mesükteper, saka tebandangji ulura ta metettsüla.
- No.15: Iba lima nung karibo mapa kanga meranga inyaker chiyunga jema alir; saka karbo kanga azümesena alir, aser chiyongtsü nungbo kanga chiyongdi alir. Item dangji samesa nisungtem ta ajar.
- No.16: Iba lima nung karbo ain adoktsü nungbo mekuru-i alir, saka item jagi yimjung yanglutsübo memetet mesüra mashi alir.
- No.17: Iba lima nung karbo tashitemetet agi sünga alir, saka karbo mashimalu tagidak maka shsiatsü agi sünga alir.
- No. 18: Iba lima nung karibo mapa tajung inyaksüang jangraa alir, saka karibo tamagitsü mapa inyaksü nung tang temulung kanga agütsür.
- No.19: Iba lima nung karibo ngasangngadem mapa inyaksü kanga jangrar, saka Tsüngrem nungi temerenshi arudangbo ayaku atener. Koda tamashi nisung?
- No. 20: Iba lima nung nisung karbo tiyazü jembiba kisung agi pei taküm liyonga aoba angur, saka item amala kibong nungjagi tamagitsü chirnurtem suteter. Kechiaser Tsüngremi item amala kibongtemji kanga junga ajioka ayur.
- No. 21: Nisungtem rongnung kari timtem aser tekangshi jenti aremzüka liyonga aor, saka item takümtemji tatem nungbo tesünep agi tembanger.
- No. 22: Kelak kübong ajanga ali rongsen bendena takar akümba nisungji kenübo timtem tulu ajurutsü, aiatai!
- No. 23: Shin o nung ashi ama, sensakeri mepishibaji takari züzüa tang doktsür, saka parnokji timtemba anogo nung shingaia hau ta malitsü.
- No. 24: Nisung kari tangar kar dak jenjang maka amai bilema mapa tamajung inyaker doktsür, saka Tsüngrem nungi parnok denjagi temerenshi arutsü sentsüh tsüa kar ta metetangma!
- No. 25: Temeim aser ochi agi liyonga aortemji entsü nung teret mali ama liteter, saka yazüyabong agi liyonga aortemji pei sasa saang (trap) sudaka ayuba nung pei tetsüng yiruba den saku alitsü.
- No. 26: Nisung kar pelaa aliba anogo nung tangar kar timtema alibaji hau ta melira, kenü anogo parnok dakji timtem atalok danga tangartem jagi menüa tang reprangtsü. Koda tesasatsü mapang ajurur?
- No.27: Jilibi nung tasentzü enoka achiba meputep ama, tasü tama ataloker jashia alitang, asayartem (jester) kari pei medemertem kanga menüshishidaktsüba jagi aika mulung yirutsür ta metettsüla. Tia mekara parnok jagi timtem ajurutsü.
- No.28: Ki ka asüandang süngkhüm tongnü agi tera mepiritsüla mesüra matongtsüla ta bilema alitang, mashimalu nisung mesüra tenükmerem aliba nisung tatishitsü agi "subangsang" ama kati süngkhümji mesüra tongnüji ano tatsüka lepdoktsüra joko ibaji tagidak mekai kümdaktsür. "tetezü takoksaji ulura kümdaktsür".
- No. 29: Mashi mali nisung kati pei medemertem den asayatepdang nok agi medemer kar dak atenjia "lepjia" saidang memeteti ka kar dakji kongshir alir. Yamaji tama asayatsü agi asayatepdang joko ochi kümer alir. Tetezü tekümtangtsü tulu lir ta shiner.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Indonesia nung Arogotem amaksü sentong liakiralongrar 11 puogo

June 01, 2021: Indonesia nung Khristan nütsüing timba aliba Papua province nung Islamic kiralongrartemi Arogo aika amaksü sentong lia Indonesia police-i kiralongrar 11 puogo, ta Hombarnü International Christian Conceren (ICC)-i metetdaksü.

Merauke district police tongti, Adjunct Senior Commissioner Untung Sangaji-i, "Merauke, Papua nung taküm tenla agüja bomb agi Tenla kitem amaksü sentong lia May 28 nü kiralongrar 10 apu aser Amongnü kiralongrar ka puogo," ta metetdaksü.

Sangaji-isa, tang pua alirtem ya Islamic State den tesendaktep aliba Jemaah Anshorut Daulah (JAD) kiralongrar telok nungi züngsemtem lir ta bilemer, aser

taoba mapangtem nunga parnoki linük nung bomb amshia lendong aiben agütsüogo, ta ashi.

Ajisüaka police-i, kiralongrartemi Arogo kwi amaksü sentong liasüar ibajibo mememetetdaksü.

Police-i tesema aika mita aoba mapang nung bomb yangluba chemicals, prangpong, jihad indang kakettertem aser Tenla kitem amaksü sentong yangluba kakettertem apu.

Osang angazükba agi, tang pua aliba kiralongrartem rongnung karibo taküm Palm Sunday nung Roman Catholic Arogo Tenla ki amakba nung shilem agia lir.

March 28 (Palm Sunday) South Sulawesi yimtiba, Makassar nung Roman Catholic

Tenla ki amakba mapang nung nisung 20 yirua liasü.

Roman Catholic Arogo-Sacred Heart of Jesus Cathedral kima Tenla kidang Palm Sunday tekülem sentong tagidak mapang nung Tenla kima nisung kari temang nung bomb alenloker pokdaksüba lendong nung nisung 20 yirua liasü.

Indonesia nung Muslim nungner nütsüing timba lir. 2002 küm Bali asetkong nung nisung 202 pokseta asüba sülen nungi tenzüka linük nung kiralongrartemi kanga timtem agüja arudar.

Kiralongrartemi bendanglen nungi arurtem dak tenük yoka inyaker, iba denji külemi sorkar ketdangsertem, police, anti-terrorism forces aser nüburtem anema inyaker.

Kolkata aser Odisha nung Arogoi cyclone agi kongshirtem yaritsü

June 01, 2021: Taoba hopta Cyclone Yass agi West Bengal aser Odisha na mejungi kongshiba sülen India nung Khristantemi timtemertem million aika yaritsü atema maparen tenzüko.

May 26, 2021 nü Cyclone Yaas agi West Bengal nung ki lakh 3 dak tema raksatsü aser nisung million 10 shi aienshia liasü.

Kolkata nung aliba Arogoi departament ajak dang timtemertem yaritsü metetdaksüogo, ta Calcutta Arogo nung social work department tongti, putir Franklin Menezes-i metetdaksü.

May 28 nü osangbener den jembidang putiri, "Yipru mopung lendong nung pei süoshi dak alaka ajak samaba kibong meyrjang aika onoki ajangshio," ta ashi.

Arogo team balalai yipru agi mejungi kongshiba kibongtem jangjatsü meranger, nisung million aika tang chiyungtsüa maka aser million tesaadng shi ki makai kümogo, ta pai ashi.

Cyclone lendong matalokdangyongi sorkari tzüyinkümlen aliba nisung million 1.5 aienshidakja liasü, ibayongji yipru lendong nung nisung ka dang asü.

Ano kidanger state- Odisha nunga nisung million tesaadng shi jenshiogo aser yirpu lendong nung nisung asem asü. Odisha Chief Minister Naveen Patnaik-i iba lendong agi kongshirtem nem anogo tenet tashi chiyungtsü agütsütsü sangdonga liasü.

Odisha kübok Balasore nung Arogo social work director, putir Lijo George-i, "Sorkari tzüyinkümlen alir nisung 650,000 dak tema aienshidaktsü liasü, ibayongji lendong nung nisung asem dang asü," ta metetdaksü.

Odisha nunga ali agi yangluba ki meyrjang aika raksaogo.

Osangbener den jembidang Putir George-i, "Ki aika tzü agi metsüngbanga liasü, tzü süngjamba sülen-a item ki tagidak makai kümogo," ta ashi.

"Yipru lendong den tzümettsüing agi nisungtemi rizünga aliba tsük ajak samaogo, ibayongji nisung aika tang chiyungtsü-a maka.

Tzümetsüing ajanga alu nung aonsotsüa raksatsü, aser alu nung tzüyim tzü yimokba ajanga ali nung metsüketa lir, anungji mapang talangka alu meymtettsü," ta paisa metetdaksü.

Sorkari hopta ka chiyungtsü agütsütsü nangzükogo, anungji iba sülen ang Arogoi chiyungtsü, tzü aser sanitary items agütsütsü tebilemba lir, ta putiri metetdaksü.

"Lendong agi kongshirtem taküm tanaben asentenshitsü atema Arogoi temelungertem den senteper inyaksü bilemdar," ta paisa ashi.

West Bengal kübok Baruipur nunga Arogoi yipru lendong agi kongshirtem yaritsü tebilemba lir, ta Arogo nung social work director, putir Parimal Kanji-i metetdaksü.

Osangbener den jembidang putir Parimal-i, Arogo team balalai tensa asadangdar, iba sülen lendong agi kongshirtem nem teyari agütsütsü, ta metetdaksü.

Arogo ketdangsertemi ashiba agi, coronavirus wara mapang timtemertem yariba agi Arogo senpong nung sen ishika dang kümogo, ta ashi.

Parnokisa, lendong balala mapang nung nisung aikati kanga melungsoa tenla agüja aruogo, ajisüaka yaküm nungi mapang shia lockdown aliba agi rongsenkettsüing nung timtem ajangshia tangbo nisung aikati tenla magütsüteter, ta ashi.

ANO GO ABEN TSÜNGREM DEN

Ateta atsüngba Tsüngrem o

Kechiaser Tsüngrem O taküm aser teinyak aser anatsü nok ajak dang nungi techiraba; aser taküm o tenüngla ya ajak ateta tsünga bendangtet aser temulung tebilemba aser tasa asaba yakta metetba. Ibr 4:12.

Tsüngrem Oi na mesüngzüketti kümdaktsür asü? Kodang nai Laishiba azünger, nai azüngba Lai tekong jagi na mesüngjemi kümdaktsür asü? Kodang nai sermon angadir, Lai jagi ne den jembir ama nai bilemer asü? Nai Tsüngrem Oji taküm aser nai bilemba ajak bendanger ta nai metetta arur.

Kodang Tsüngrem Oi ne den jembir ibai teti nükjitung ka asoshi jembir. Tsüngremi ne mulung aser na Khrista den akanga sendaka alitsü asoshi na kechi nüngdaker aji metet. Nai temenen indang jembiba tebilemetsü kar lira, ne dangi aruba Oji temeli ajanga arur. Nai tatok agütsütsü merangya lira Tsüngrem jenjang nung tatok agütsütsü o jagi sayutsü. Asükümüji ne taküm nung kamdong takang ka lir. Tsüngrem ne den ajemtsü atema jembitsü. Kechi temenen indangsa jembidir jembiang, iba mapa ajak na Tsüngrem ajanga nokdanger.

Ne tamang nung mesüngjemtetba paidoktsü lenmang kaji Tsüngremi ne den jembiba mangai toktsübaji lir. Nai Laishibaji mezüangi toktsütsü akok aser kong iba o sayur iba nung jagi pilaa alitsü akok. Shirnoki ibai soter ta nai metet, nai parnokji sentoktsü akok. Tajungtiba telangzübaji ken zülur sarasademji lir: "O Tsüngrem, kü dak bushiang, aser kü mulungjang metetangma: Ni tendangang, aser kü tebilemba metetangma" (T.Ken 139:23). Maneni Tsüngrem O jagi ne mulungjang shidokjang aser temenen kar ta lira bushitettang (Ef. 5:26). Teti ne taküm aser Tsüngrem O ajanga ne dang kechi ashir ana tsüngdaji sendaktepa ali bilemang. Tsüngrem O-i ne tebilemba aser ne mulungjang metetter ta metetta Tsüngrem O ajakji süoki ia agitsü yimya küma alitsü merangang.

India nung Arogoi coronavirus agi asür putirtem nem akhüm agütsü

New Delhi, June 01, 2021:

India nung Catholic Arogoi pastor mapa inyakba den külemi coronavirus wara mapang nung nübur tenzüka mapang coronavirus tashidak menazüka asür putirtem aser nun tem nem bilemteta tetushi agütsü.

"Indian Currents" magazine nung yimobilem zülur, Suresh Mathew-i linük nung putirtem aser nun tem coronavirus tashidak agi asüba osangtem bendena liasü.

Putir Mathew-i, "Coronavirus tashidak agi asür putir aser nun tem timbaka yimtsüngtem nung pastoral mapa inyakertem liasü, ibayongji parnoki mapang shidak nung medical treatment magiteti liasü," ta metetdaksü.

India nung Catholic putir 30,000 shi lir aser nun 103,000 shi lir aser tang iba wara mapang nung putir aser nun 400 dak tema iba tashidak agi süogo.

Coronavirus agi asür putir aser nun tem timbaka Jesuits liasü, aser parnoki India nung sensakertem, tribals aser tekübokba jenjang nung alirtem tenzüker.

Missionaries of Charity nungia nun 14 asü aser parnok timbaka hospital nung duty inyakba mapang nung iba


tashidak menazüka liasü.

"Putir karibo asüpila sentong agitsü mesüra shirangertema anepalua liasü. Kanga tezülen aliba tesemtem nung putirtem nüburtem tenzüka mapang nung iba tashidak menazükba sülen parnoki mapang shidak nung treatment magiteti liasü. Parnok yimitem nung ali asübo mapang shidak nung treatment agia kümzüker lika," ta Mathew-i metetdaksü.

"Parnoki iba wara mapang tangar dang nungi pilar melinü saka maneni tenzüka mapa inyaksü aser Tsüngrem temeim lemsatapa timtemertem yaritsü jangra. Nun, putirtem aser missionary tem aika asüba atema onok mepelar. Onoki kanga mangyimer, kechiyong onoki parnok aika meteta liasü," ta Indian Missionary Society nung züngsem, Anand Mathew-i metetdaksü.

Indian Missionary Society nungia putir asem coronavirus tashidak agi süogo.

Odisha kübok Bhubaneswar nung tongti putir, John Barwa-i, "Ozü Arogo nungia putir ana süogo. Putir anaji kanga tezülen aliba mission nung tenzüka liasü. Missionary tajung ana asüba ya Arogo, lokti aser linük atema takaksa tulu," ta metetdaksü.



Coronavirus prokba nokdangtsü atema lockdown aliba mapang Bengaluru nung aliba Bethel AG Church-i 'Worship on Wheels' kübok moapu nung motorbike nung mener tekülem sentong agiba mapang tangokba noksa nung angur.


OLONG PAITEP # 5831

1				2					3	
						4		5		
6			7							
					8		9			10
11										
12		13					14			
		15								
						16				
	17									
					18					

TIPILEN		LANGTSÜNGLEN	
1. Yakob tetsü - (6)		2. _ _ _ gki - (3)	
4. Mezüng nisung - (4)		3. Telungpur telok ka - (2)	
6. Tasen lai kakat ka - (5)		5. Tsüngremi mezüng paktetdaksüba - (5)	
9. Au lanu - (2)		7. Tia - (4)	
12. Tejen lai 21 buba - (11)		8. Yakob-er jabaso ka - (5)	
15. Tekolak tembar - (2)		10. Abraham tebutü - (4)	
16. Zütsüra anepsang - (5)		11. Rebeka kinungpu - (4)	
17. Kain tenu - (4)		13. Esau tenu - (5)	
18. Hana-er jabaso - (6)		14. Tzünglu tilala aru - (4)	
		16. Jafet tebu - (3)	
		17. Teka agi kongshi - (2)	

OLONG PAITEP # 5830 TELANGZÜBA

TIPILEN :	LANGTSÜNGLEN :
2. Pongsen, 5. Lepko, 7. Omen, 8. Maongka, 10. Yangkhu, 12. Senpong, 14. Angu, 15. Raksa, 16. Arameso,	1. Alimang, 2. Pongen, 3. Samaru, 4. Nün, 6. Pio, 9. Nüngdak, 10. Yongya, 11. Kongro, 13. Ora, 14. Ata.



TETSÜI AIÜRLA DEN SENSAXSEMA AMENER

Tetsü : Aiür, tanep yabo nenok maparen aika dang liaka ojala ana mapang tatsüka sensaxsema kazüner atu.

Aiürla : Aya oja, nai kü den kechi nüngdak ka atema sensaxsema kazüner aka? Ajibo nia kanga dang angadangner atu.

Tetsü : Hai aiür, yashitubo ojala mapang tatsüka anisüngzüka amenba mapang, ojala indang phone lapoker youtube repring nungbo tanüng asüng nenoki ken kar mejema atenba tu repringhia ojala temulung kanga dang anisüngzüka jangradema dang repringogo nu.

Aiürla : Ayama kanga dang pela ati. Oda asenbo tangar ama kenji junga metenteter ako, saka oda asen tamanger ken kar mejema tendangerba dang ako.

Tetsü : Aujatu ano nenok amala lanur telok kari kanga dang junga renemteter asen tamanger ken tetezü tajung; tatishitsü agi ni Yisu den aotsü ta, ano ni Yisu ajuruogo ta, kodakji ni atongsü ta asüba amala kentü onsara tajung, kanga jangradema repringa angaogo, saka ken tetezü tajung tentetba ama asen takümüja mapang ajak nung koma liteter aji dang tongtibangtiba. Oda ken nung ashiba ama nü takümüji kakat ka lir aser tangari aji züngdar anungji yamaji asen takümüji kanga dang ajemasünga asen teyanglur aküm tsüba pei taküm melenshia ano ken tajungtiba mejema atentsü merangangma.

Lilir: S. Repa Pongener, Mon Bosti (Assam)

TANÜBO NAI LANGZÜANG

Q. International Atomic Energy Agency Indang headquarters kong lir?
 A. Austria B. Switzerland C. Paris D. Geneva

_____ (Taruba adok nung onoki langzüsü)

YASHI ADOK TELANGZÜBA: Deshmukh

AO OSHI ANGAZÜKDAK:

TANÜ ANGAZÜKTSÜBA OJANG

Jemdi

(v) Tzü tebang nung enoker meyokdi ta ashiba (drink)

* Takarsangi ni tzürrar tzü **jemdi** ta ashi.

Jemji

(n) au aser merang agi pongdang ama yanglur tebang agi apudang temeyong agi nemshia ola adokdaksüba kongki (flute / bagpipe)

* Scotland nungertemi **jemji** kanga junga apur.



Tir Yimyim

NAI-A YA METETTER MA?

JUNE ITA TONGTIBANG ANOGO KAR:

(Yashi adok nungi...)

- 14-June - World blood donor day
- 15-June - Global Wind Day
- World Elder Abuse Awareness Day
- 17-June - World day to combat desertification and drought
- 18-June - Autistic Pride Day
- 20-June - World Refugee day
- 21 -June - World Hydrography Day
- International Yoga Day
- World Father's Day (Every 3rd Sunday of June)
- World Music day
- 23-June - United Nation's public service day
- International Olympic Day
- International Widow's Day
- 26-June - International day against Drug abuse & Illicit Trafficking
- 30-June - World Asteroid Day

SUDOKU # 5873

TELANGZÜBA # 5872

			7	6		8			3	8	6	5	9	2	4	1	7
	4	5		8		3			1	7	4	3	6	8	2	5	9
3			5		4	6	9	1	9	2	5	4	1	7	6	3	8
	3		9	8		4			4	6	3	8	7	9	1	2	5
			2	7					8	9	2	1	5	3	7	4	6
		4	6	3	1		8		5	1	7	6	2	4	9	8	3
				7		1		5	7	5	9	2	8	1	3	6	4
5	1		4	9			3	8	2	4	8	7	3	6	5	9	1
2		6	3	1		4	7	9	6	3	1	9	4	5	8	7	2

OJANG LUTEP # 5417

- KATAR :
- ROTEKO :
- TIKA :
- SAKESEN :
- GDAN :
- EIAPNG :
- TONGKROBA :
- ERAS :
- TIEMMTBA :
- YUTSAET :

OJANG LUTEP TELANGZÜBA # 5416

TIMTEM KHURET ARUDANG MESÜITEMTSÜ AMA BILEMER DANGASHI YAKTA DANG SÜIADOKER

TAN HOPTA ATEMA - KOMA SÜLA ?

Q. Asenok Aotsür Aor kidang tangar nisung kilir mayu nunga koma süla ?



Baba Ramdev-i allopathy dak sendakba nung pa tebilemba lemsatepba sülen, linük ajunga nung Black Day longkak aitba sentong ayongzüka agiba mapang New Delhi nung Federation of resident doctors associations (FORDA) aser Resident doctors Association (RDA) Safdarjung Hospital nungi doctor temi ribbon tanak mesüba noksa nung angur.

Sputnik V Covid-19 vaccine million asem India tonga aruogo

Hyderabad, Aami/June 1 (Agencies): Russia indang COVID-19 vaccine Sputnik V dose million asem Mongolbarnü Rajiv Gandhi International Airport tonga aruogo.

GMR Hyderabad Air Cargo (GHAC) sangdong ka ajanga ashiba agi, Russia nungi vaccine ya specially chartered freighter RU-9450 ka nung bener aruogo, koba Hyderabad Airport nung 03.43 ako nung anena liasü.

"Tanü vaccine bener maru tsünga GHAC-i tanga linük nungi bener aruba vaccine aika agizükogo, ajisüaka tanü vaccines tone 56.6 bener aruba ya tang tashi nung anogo ka nung India-i COVID-19 vaccines bener aruba timtiba asütsü. Khu bener aruba dak

sendakba nung inyakyim ajak tembanga inyaker minute 90 maju tsünga lemshio, ta GHAC sangdong ajanga metetdaksü.

Sputnik V vaccine ya kanga kümdanga amshitsü nügdaker aser mozü meraksatsü atema temperature -20 C nung ayutsüla.

Vaccine bener arubatem kecha tetsükdaksü makai agizüka lemshittetsü atema Air Cargo Terminal nung tenügdakba infrastructure ajak amenoktsü aser amshiba yimya tapet benoktsü atema GHAC-i, customers supply chain team nungi mongintem, customs department nungi kettangsurtem aser tanga stakeholder tem den joko mapa

tatsüka inyaka arudar, ta kasa sangdong ajanga metetdaksü.

India nung Sputnik V vaccine mezüngbuba dose million 125 (250 million vials) ayoktsü atema Dr Reddy indang Laboratories aser Russian Direct Investment Fund na tenanzüktepba ka yangluogo.

Sputnik V vaccine jongdak mapang nung amshitsü atema Indian drug regulator-i, Dr Reddy indang Laboratories nem temelaba agüjatokogo.

Taoba mapang Dr Reddy indang laboratory-i RDIF vaccine lakh ana dak tema agizükogo aser tawa Sputnik V vaccine-a amenokogo aser vaccine agütsütsü atema Apollo Hospital tem den sendaktepogo.

Security Forces temi Maoist telungpur ana kaset

New Delhi, Aami/June 1 (Agencies): Mongolbarnü Chhattisgarh kübok Kondagaon aser Kanker districts arrtsü nung Maoist telungpur ana kasetogo, ta police-i metetdaksü.

Kondagaon district kübok Bhandarpal arem min nung telungpur aser police na khatepba sülen Maoist züngsem ana tasümgang nguteta liasü, ta police kettangsur kati ashi. SLR rifle ka, .303 rifle ka aser 12 bore rifles asem densema khatepba tesem nung

hadir aika ngutetogo.

Rajpur-Bhandarpal-Timnar arem nung 'North Kanker-Mainpur Division Coordination Committee' telungpur munga aliba osang angazükba sülen Security forces temi Hombarnü iba tesem meita ao.

Mongolbarnü 12.30 ako shi nungi telungpur aser sepaitem khatepba tenzük aser ghonda kashi khatepba sülen tetsür ka densema Maoist züngsem ana kaset.

Kondagaon Superintendent of Police Siddharth Tiwari-i, khatepba mapang ano

telungpurtem karbo yirur alitsü saka parnok iba tesem nungi jena otetogo, ta ashi. Item telungpurtem aputsü atema temeket tesemtem meita odar, ta paisa ashi.

Kasa mapang nung Inspector General of Police, Bastar Range, Sundarraj P-i, Amabeda Iragaon, Dhanora aser Kanker nungi BSF, ITBP, STF, DRG sepaitemi district arrtsü nung senzüsenpongba telungpurtem aputsü atema joko anogo ishika iba tesem meita odar, ta ashi.

UP nung BJP party lepa reprangshiba senden menogo

New Delhi, Aami/June 1 (Agencies): Bharatiya Janata Party (BJP) national general secretary (organization) BL Santosh-i Mongolbarnü Uttar Pradesh nung party lenir tejentem den senden ka menogo. UP nung party inyakyim asadangshitsü atema anogo ana senden ayongzüa maneogo. Iba senden ya kanga tongtibang, kechiyong state nung taruba küm election agitsü lir.

Santhosh-i deputy chief ministers Keshav Prasad Maurya and Dinesh Sharma, aser labour minister Swami Prasad Maurya nunger den ajurutepa liasü.

"2022 küm election nung onoki menden 300 akoktsü," ta senden tembanga sülen Keshav Prasad Maurya-i ashi.

Hombarnü Santhosh den Union minister Radha Mohan Singh-i, minister aser tongtibang kettangsurtem den ajurutepogo aser iba sülen state yimtiba Lucknow nung chief minister Yogi Adityanath den par kidang ajurutep.

Pa Hombarnü Lucknow nung BJP indang state headquarters tonga ao. Pa den Uttar Pradesh BJP tir

Swatantra Dev Singh, party nung külem tenzük JPS Rathore aser Govind Narayan Shukla aser minister Mahendra Singh nunger Lucknow-i ao.

Shukla-i ashiba agi, pai UP semdangba mapang Santhosh aser BJP lenirtemi Covid-19 wara pokteter aliba mapang amenokba helpdesk aser tanga sentongtem lepareprangshitsü.

Uttar Pradesh kübok Covid-19 tashidak menar alir 600 dak tajemba aliba district 75 nung tenokdangba agütsür aliba sorkari tajemba kümdaktsüogo. Mongolbarnü iba list nung district asem bendenloka liasü.

Iba jenjang agiba sülen Uttar Pradesh kübok district 64 'corona curfew' nungi jenbogo.

Ajisüaka Meerut, Lucknow, Saharanpur, Varanasi, Ghaziabad, Gorakhpur, Muzaffarnagar, Bareilly, Gautam Buddha Nagar, Bulandshahr aser Jhansi district tem nung maneni tenokdangba balala agütsür aliba magintsü.

Uttar Pradesh nung Assembly election 2022 küm agitsü. Iba state nung Lok Sabha menden 80, assembly menden 403 aser nütsünyongsük million 200 dak tema lir.



New Delhi nung Congress panel on Punjab den senden amenba sülen Punjab Congress MLA Navjot Singh Sidhu Congress 'war room' nungi adokba noksa nung angur.

"July tashi nungbo anogo nung nisung crore 1 nem vaccine agütsütettsü": ICMR

New Delhi, Aami/June 1 (Agencies): Indian Council of Medical Research (ICMR)-i Mongolbarnü ashiba agi, anogo nung nisung crore ka nem vaccine agütsütettsüsa India nung July mesera August ita tetenzüklen tashi nungbo vaccine peria alitsü. ICMR tekolakba Balram Bhargava-isa, health ministry-i ayongzüka press conference ka nung vaccine agi anünga mali, ta ashi.

"July tom mesera August ita tetenzük tashi nungbo anogo nung nisung crore ka nem vaccine agütsütettsüsa teperi alitsü. December ita tashi nungbo nütsünyongsük ajak nem vaccine agütsütettsü ta temulung lema bilemer," ta Bhargava-i ashi.

Paisa, tenokdangba agütsür aliba tanem tanemi salatsüyonga aoba ajanga Covid-19 tashidak tali menatepyonga maotsü, ta ashi. "Ajisüaka vaccine agitsüba ya tongtibangtiba kümdaktsüsüla. Vaccine agütsüba rate ya shilem 70 bosa asütsüla. Iba den covid dak sendakba yimayimpong tim bentshitsü nügdaker," ta Bhargava-i ashi.

Health tsütsü mongintem aikati India nung vaccine agütsüba sentong ajungkettsüla ta akhangba mapang ka nung ICMR tekolakbai iba osang lemsatepogo. State akati vaccine agi anünga ashishio aser state karibo vaccine indang indanga bener arutsü atema global tenders agütsüogo.

(Maneni tapak 9 nung...)



Lucknow kübok K D Singh Babu Stadium nung amenoka aliba COVID-19 vaccination center nung vaccine agitsü atema nüburtem tarensena nokdaker aliba noksa nung angur.

Myanmar mitkari longkak aiter tem mazüokteti arudar

Yangon, Aami/June 1 (Agencies): Myanmar nung pro-democracy pusemertemi Mongolbarnü districts balala nung longkak aitba sentong ayongzüka agiogo. Kasa mapa nung military-i sorkar atsüngtokba sülen arrtsülen telungpurtem aser army na tsüngda

Security forces temi tashiyim amshia nokdangtsü merangaka Myanmar nung Military-i nüburtem aziüoktsü mekoki arudar.

Myanmar anüolen tip len military anema Laung Lone nung nüburtemi longkak aitba noksa Irrawaddy newspaper ajanga sayaa liasü.

Ano Yangon kübok Kamayut district nunga lanurtem telongsoba ser longkak aitba Myanmar Now news portal ajanga sayuogo.

"Maparen ano metembang. Onok mapang arutsü," ta longkak aiter kati zülua amer liasü.

Longkak ait tenzükba mapang sentong tululu ayongzüka agiba ajanga mangatetep tulu adokba sülen security forces paitoktsü atema yimti aser jila balala nung longkak aiter temi osang magütsüi longkak aitba sentongtem ayongzüka agi arudar.

Military aser lokti nung nübo agi ajema aliba kin balala sepaitem tsüngda arrtsü nung küm aika mangatetep adoker arua aliba sorkar atsüngtokba sülen ano jangrushiogo. Telungpurtem aser shadow civilian government-i army amak tenzükogo aser army-i

Uganda minister ka tepsettsü merang; par jala asü

Kampala, Aami/June 01 (Agencies): Prangbong bena alirtemi Uganda indang taoba mitkar lenir tepsettsü meranga amakdang pa yirutsü aser par jala den gari anir tepset.

Mongulbarnü Kampala tezülen Kiasasi nung lendong agütsür nisung pezü motorcycle nung arua works and transport minister, General Katumba Wamala mena aliba gari nung injang khaloktsü, ta yangji aliba NBS television station ajanga ashi.

"Pa dena khatap... pa yiru aser mozü kidangi anir ao, pa indang gari anisang tepset," ta army odongtar Brigadier Flavia Byekwaso-i ashi.

Wamala'er jala, shiba gari nung pa den mena liasü, la-a tepset, ta NBS ajanga ashi.

Social media nung noksa temprokshiba nung Katumba ya SUV gari ka tezülen temolung kanga shiranga mena liasü, aser

meyper tayimtsü aser hadir balala amshia item telungpurtem amakba ajanga nüburtem meyrejang aika pei talidak ki toktsür jenshia aotsüsa kümogo.

Thailand den arrtsü nung aliba Kayah state nung alir kati mobile phone ajanga tangokba video ka nung state capital Loikaw nungi Demoso dak artillery khaloktsüba nguogo. Iba tesem nung amenoker aliba People's Defence Force-i ashiba agi, parnoki sepaitem amak aser meyper parnok dak kanga mejungi injang khaloktsüdar.

Loikaw nung alirtemi ashiba agi, Hombarnü artillery injang 50 shi khaloktsüogo aser Mongolbar anepdanga injang trok khaloktsüogo.

Kayah state nung amenoker aliba Karenni Nationalities Defence Force-i Facebook ajanga, parnoki army 80 tepsetba aser iba den parnok sepa ka aser civilian ka asüba osang metetdaksüogo.

Kayah nung hopta ishika army aser telungpurtem khatapba ajanga nüburtem 37,000 shi pei ki toktsür jenshiaogo, ta United Nations-i ashi. Nisungtem aika aremi jenaogo aser parnok chiyongtsü aser mozü nüngdaker, ta ashi.

Sorkar atsüngtokba sülen military-i nisung 840 tepsetogo, ta activist telok balala metetdaksüogo.

Kasa mapang nung Junta tekolakba Min Aung Hlaing-i, nisung 300 shi süogo ta ashiba den Myanmar nung civil war madoktsü, ta ashi.

pa indang tula azü agi melangbanger liasü.

Social media nungsa gari ka nung injang agi tapok adoka khapoker aliba noksa nguogo.

Africa anüdoklen Uganda lunük nung küm ishika tsüngta ketdangtsür aika tepsetba aser kuli tejangja monguteti asüba ataloka arur, saka item mapa inyaker aser parnok nükjidong mejangjateter.

Asürtem rongnung ozüing yanglur ka, police tanishir ka, linük nung obendanger tematiba, Muslim nung lenir ka aser dangartem dena lir.

Katumba tepsettsü merangba ama 2017 küm linük yimtiba, Kampala tezülen prangbong amer motorcycle nung arua police tanishir ka mena aliba gari nung injang khalokja liasü.

Iba mapang police tanishir Felix Kaweesa den pa anüker aser driver takum sama.

Tokyo Olympics map nung asetkong ka inoksemba South Korea-i ashishi

Seoul, Aami/June 1 (Agencies): Tokyo Olympics website nung adoktsüba map ka nung South Korea kübok aliba asetkong ka Japan litsü nung aliba ama sayuba sülen South Korea-i Mongolbarnü Japan deputy ambassador jaokogo.

Asetkong koba South Korea nung Dokdo aser Japan nung Takeshima ajar, iba asetkong dak sendakba nung linük ana tsüngda küm aika mangatetep adoka arudar.

Torch relay indang lenmang sayuba Tokyo Olympics website nung Japan indang map nung iba asetkong adoktsüba sülen South Korea nung nüburtemi ola adok.

Seoul-i map melenshitsu ahangba Tokyo-i magizük aser iba ajanga South Korea nung yimden yimsüsür kari Olympics nung shilem magitsü ayongzü.

South Korea foreign ministry sangdong ka ajanga ashiba agi, map melemshitsu atema parnoki Seoul kübok Japanese Embassy nung deputy ambassador Hirohisa Soma jaokogo.

Iba asetkong dang ya Liancourt Rocks taka ajar, koba South Korea asdoklen tzüküm nungi km 225 pilar lir. South Korea-i iba asetkong aziöker, ajisüaka Japan-ia iba asetkong ya parnok meyong ta ashir.

Olympics nung shilem

magitsü atema ayongzüka dak sendakba nung Choi-i kecha telangzüba magütsü saka ashiba agi, sorkari iba tensa kanga kümdanga meita atatsü.

South Korea nung 2018 Winter Olympics mapanga, unified Korean peninsula indang wako ka nung iba asetkong inokba anema Japan-i nokdak.

Seoul aser Tokyo na tsüngda iba asetkong aser 1910 nungi 45 tashi Japan kübok Korea aliba mapang Japanese firms tem aser military brothels tem nung Korea nungertem tashiyim agi mapa inyadkatsüba atema linük ana tsüngda tesendaktep mejungi lir.

WHO ajanga COVID nungjatem Greek oshi agi melentsür

Geneva, Aami/June 01 (Agencies): World Health Organization (WHO) ajanga COVID-19 nungja agütsübayim tasen ka sangdongogo.

Tang nungi tenzüka UK, South Africa aser India amala linüktem nung mezüing putetba COVID-19 tabu nung WHO-i Greek nung ojangtem amshitsu.

Tetetzü UK nung putetba tabu dang ya Alpha ajatsü, South Africa nung ngutetba dang Beta aser India nung ngutetba dang Delta ta ajatsü.

Ibai jembishinü nung tali tongmelangba kumdaktsüsü aser ano nungja agütsüba nung metsük-mokonga aitdaksüba samadaktsüsü atema lir, ta WHO-i ashi.

Taoba küm October ita India nung mezüing putetba coronavirus tabu B.1.617.2 dang "Indian variant" ta nungja agütsüba atema ita tetenzüklen India sorkari aitsü, ajisüaka WHO ajanga kodanga iba ama nungja ya mamshi.

"Virus tabu balala putetba ajanga linük kata metsük-mokonga mamshitsüla," ta WHO indang COVID-19 technical lead, Maria Van Kerkhove-i Twitter nung zülutsü. Laisa iba tashidak tabu balala kanga junga mita

scientific data tem lemsatapa tashidak prokshia aoba anendaktsüsü ayongzüka liasü.

Item Greek nung ojang yagi tang scientific tsütsü nungja agüja aliba yabo memelenshitsu. Coronavirus ya tabu 24 dak talila jangjateta Greek nung ojang agimara, nungja agütsüba sentong tasen ka sangdongtsü, ta Van Kerkhove-i osangbener senden ka nung ashi.

"Onoki B.1.1.7 ya melenang ta ashir masü, saka nisung kar jembishinü nung yaritsü meranger. Anungji yimjak nung jembiba mapang asenoki item tabu ya temelaba ojang amshia jembitetsü," ta lai ashi.

UK sorkar den yaritepba scientist temi linük nung coronavirus tashidak menatapa aoba 'wave' asemubaba tenzükba mapang lir, koba India nung mezüing jangjatetba Delta variant yagi lir, ta Hombarnü ashi.

Alpha (UK; Kent nung mezüing putetba) tabu dang nungi Delta variant ya tekeraba prokshia aor. UK nung asükwa mapang Alpha variant yagi COVID-19 cases aika kumdaktsü.

Vietnam nunga COVID-19 tabu ana meyoktepba mesük puteta lir. Iba ya mopung ajanga kanga kera prokshia aotsü aser kangasa lendong tulu aketba ka,

ta Vietnam health minister-i Honibarnü ashi.

WHO ajanga Alpha nungja agüja aliba B.1.1.7 ya United Kingdom nung 2020 küm September ita mezüingbuba jangjateta liasü. Beta nungja agüja aliba B.1.351 tabu ya South Africa nung May 2020 nung mezüing jangjatet aser Gamma nungja agüja aliba P.1 tabu ya Brazil nung November 2020 nung mezüing puteta liasü.

India nung October 2020 nung mezüing jangjatetba coronavirus tabu B.1.617.2 dang Delta ajatsü.

US nung March 2020 nung jangjatetba B.1.427/B.1.429 coronavirus dang Epsilon ajatsü aser Brazil nung April 2020 nung mezüing jangjatetba P.2 variant dang Zeta nungja jaloktsü.

Linük aika nung December 2020 nung mezüing jangjatetba coronavirus B.1.525 dang Eta ajatsü aser Philippines nung January 2021 nung mezüing putetba P.3 variant dang Theta ajatsü.

US nung November 2020 nung mezüing jangjatetba coronavirus tabu ka, B.1.526 dang Iota ajatsü aser India nung October 2020 nung mezüing putetba B.1.617.1 variant dang Kappa ajatsü.



Edmonton, Alberta kübok Kamloops, British Columbia nung taoba mapang residential school ka alidak tila tanur 200 dak tema indang tasü mang ngutetba temaitsü nüburtem adenshia parnok indang tsüngsem yutsüba noksa ka yangi angur.

OFFICE OF THE
AONOKPU VILLAGE COUNCIL

P.O. - MANGKOLEMBA, B.P.O. - LONGCHEM
MOKOKCHUNG : NAGALAND

Ref No.

Date : 1st June 2021

Aonokpu Yimten sabang aser Khristar Arogo kilem nungi molungnen yimiyim ola
LATE IMOLANGBA LONGCHAR NUNGTEM

Noklang metsübuba putu tom-ka nung Aonokpu lima nung sotetba, Karimera metsü, Longranok nangbong, walunir Wabong Imolangba Longchar sojasor, inket nisung ka, yimkong asoshi moatsü, saka amman milen zükseb medem kodanga majoroteptsüsa senshi nung nüburttem molungbo koremerani, saka nü tsügnep asoshibo, molungnen ola madoki melitet nung, iba yimiyim ola agütsür.

Akümlir redisen arishirbo ano tenemsür metsü mabensa, saka nai inyakba terenlok mapatem asatanga, noklangjong nisungi inyakba mapatem alemtanga abensaogo ta züngdangteter.

Saka nüburi memoa nung, tanü putu asoshi sotsüba Imolangba Longchar dak akümlir toktsütsü Teyanglur amsü kao nung Dipu lima telongsoba kümogo saka akümlir limabo azüngmeyaka lir.

Pa ogo joko pa asenok den malitsü. Milentong ka aginogo, tesangwa remsebogo, aika molungjang nungi tepela atsüteta bener ogo, joko pa den atongsemstsü mongbo shilua marutsü. Pai tsügnep dang toktsür ogo, Ya asen senmang lir.

Tang pa tsügnep senmangji züngdangdi ta asünung, koba indang shir koba-ang mashitsü. Saka akümlir molungsütsü asoshi aser angazütsü atema aika rongnungi kar sangdonger.

Pa taküm ya pei o nung aliba nisung.

- Tebangur ama seplasebshiba yimya pa dak maket.
- Tang ajung asa-a yakta meyepshiba yimya pai memetet, saka ochi tangatetba nung jangjilong.
- Yimten lokdi aser Arogo nungdak atokdang pai tokorotsü memetet nung ajak tongtangtetba jong.
- Kechi inyaktsü atemzük, iba mapaji merenemi nemdoka yutsüba nisung pa masü.
- Pai tangar dak yimla-a masü, saka tangari pa dak yimla.
- Tebilemstsü khuret tulu arudang, tangar dak atsükoker tsübua aser atsüngzüka maliba nisung.
- Ochi mapatem inyakdang tezü nungi nüngsen khuret aser amokmeren arudang, kecha metsüboi tenzüktetba lenir.
- Tanü nungdaktem abensatsü asoshi bilemba tang nungi asüng asoshi tali awaloka oa, yangreteta yütsütsü nukla tulu akaba tabensa walunir takümüji asür Wb. Alangba Longchar liasü.

Item kuliji abensadakja imkong nung külem soteter ola dak alaka kishikina nungi aser Ao Baptist Arogo mungdang nungia kuli aguja jangjaogo ta nüburi pelaba ola yoker.

Tanü asen nüburi nungi pilaa aoba nüburi nukrangdong walunir, Wabong Alangba Longchar atema inyaktsü mapa ka lir aser aji ya.

Pai toktsür aoba Aonokpu nüburi rongnungi talisa lanu putu nungi aser iba dak alaka pa metsü nungi, pa mesüka aser ano tali ajangdanga, walunir, Wabong Alangba Longchar ama sojasor jenti adokdakjang ta yimten aser Arogoi nuktsü yimiyim ola agi Teyanglur Tsüngrem dang takangba ola yoka yimiyim ola atemer.

Sd/-
(P. ALEMNEREN LKR)
Chairman
Aonokpu Village Council

Sd/-
(NOKZEN IMCHEN)
Secretary
Aonokpu Village Council

PELABA LEMSATEPER

Asür Zülubenla

ASO: 06.07.1937 - ASÜ: 29.05.2021

Onoki kanga meimba kinungtsü/ojala mapang talangka shiranga arudang aser la iba alima nungi pilar mangyimba mapang kija, medemerterem, temeimerterem, Arogotem aser lokti tentet balalai ozü dang tauchi sayuba atema tebang agi rasa meshitetba pelaba metetdaksür. Nenoki sarasadem, nübo, rongsen aser shisatsü agi nungita yariba ajanga ozü kibong nem tashi agütsüogo. Tulusang Tsüngremi nenok ajak maneni molamoshia moajangma.



Temeim Kinungbo aser Kinungertem.

Mon nung 'World No Tobacco Day' mungogo

Mon, Aami/June 01, 2021 (TYO): Hombarnü poster yangluba tetoktepba nung takok angur tenüngtem sangdonga liasü. Iba tetoktepba nung takok angur tenüngtem yamai alitsü: - 1st prize- MS. SHIKNA, Class 12, St John's hr. Sec. School Mon

- 2nd prize- AWA T.M Konyak class 9 from DBHSS
- 3rd prize- ANGLANG S KONYAK Class 10 from St Mary's High School
Maneni, Jr. Dental Surgeon, Dr. Amenla-i telok pela agizük aser DNO NTCP, Mon, Dr. I. Simon Sumi-i tepela anküp o jembu. Iba sentong nung District Consultant, NTCP Mon, E Nyeamyang Konyak menden liasü, ta kasa sangdong nung ajanga metetdaksü.

Jr. Dental Specialist, Dr. Neingutunuo-i "Commit to Quit" omen nung ajemdaker moko/sali achiba aser item temesepba chiyongtsü achiba ajanga nisung akoksadaksüba den temang nung timtem balala adokdaksüba indang lemsatep. Kasa mapang, tobacco dak

tem rasa ashi. Temesepba chiyongtsü tem nokdangtsü aser nüburi dang angatetdaksütsü mera balala agia bendanga agüja inyakba atema DC-i NTCP Mon Team dang pelaba metetdaksü.

"July tashi nungbo... (Tapak 7 nungi...)

Health ministry-i Deobarnü, June ita linük ajunga nung vaccine agütsüba sentong ayongzüka agiba mapang vaccine doses million 120 agütsütsü ta metetdaksüogo. "Wara azüoktsü atema tashidak tendangba, anepaluba, tashidak keta alir bushitepyonga aoba aser Covid dak sendakba yimiyimpong shidak benokba beshiba den vaccine agütsüba sentong ya India sorkar sentong nung kanga tongtubang lir," ta health ministry-i ashi.

Vaccine agütsüba sentong ya taküm January ita tenzüka aser Serum Institute of India (SII)-i yangluba AstraZeneca indang Covishield vaccine aser Bharat Biotech-i yangluba Covaxin agüja arudar. Kasa mapang nung Controller General of India (DCGI)-i, private mozüki kar nung amshitsü atema Russia nung yangluba Sputnik V nem temelaba agütsüogo.

SII aser Bharat Biotech napronglai Deobarnü, parnokki tang vaccine million 75 nungi 80 yanglua aliba ya million 110 nungi 120 tashi yanglutsü atema inyaktepdar, ta metetdaksüogo.

Film maparen tenzüksütsü atema Maharashtra CM dang mepishi

Mumbai, Aami/June 01, 2021 (Agencies): Flim dak sendakba maparen tenzüksütsü melatsü atema film tenteti tezüluba ajanga Maharashtra CM dang mepishio.

Federation of Western India Cine Employees (FWICE)-i media and entertainment (M&E) industry tsütsü maparen tenzüksütsü asoshi mepishia Hombar (May 31) nikongdang Maharashtra Chief Minster Uddhav Thackeray dangi shidi ka yokogo. India nung tanaben Covid-19 tashidak adoka nüburi aika iba wara agi kangshiba ajanga film aser television atema maparen (shooting) ajunga anener lir.

Iba shidi nung FWICE Chief Advisor Ashoke Pandit, President BN Tiwari, Chief Advisor Sharad Shelar, General Secretary Ashok Dubey aser Treasurer Gangeshwar Shrivastav nungeri sign süa lir.

"Iba onük dak sendakba nung, M&E Industry maparen

tenzüksütsü asoshi mepishia aser nü telangzüba aginüa FWICE aser co-ordination committee ajanga aiben tezüluba agütsüogo. Ajisüaka, onoki yokba shidi ka danga office ajanga telangzüba agüja mali aser onoki mepishia züluba dak sendakba nung telemtetba kecha magütsü lir," ta shidi nung shia lir.

"Sir, iba wadang nung artist, mapa inyaker aser technician nübu lakh aika lir, shirnok tesüiba küm ka ser tesarangka nungi mapa mali kümogo aser parnok atema sen tarutsü lenmang ji M&E Industry nungi dang lir. Iba industry ajanga nisung lakh aika nem mapa agüja arudar aser iba mapa nungi aazükba sen jagi parnok kibong mesür. Ajisüaka, industry shibangadokba ajanga anogoshia ayangertem (film industry nung inyakertem) taküm nung kanga mejungi kongshio, shirnok sen tarulen lenmang tanga kecha mali aser

Industry indang maparen nungdang parnok taküm metaloker alir," ta film tentet ajanga züluba shidi nung shia lir.

"Ano anogo 15 tashi lockdown atsülangtsü osang sangoktsüba ajanga artist, workers aser technician tem timtemba den külemi Industry tsütsü rongseketsüng nunga tetsükdaksü tulu adokdaksütsü. Mapa inyakertem dang masü, saka rongsen jenti indoka project inyakbatem, koba lockdown ajanga maparen anenja lir, item project nung inyaker producer tem kanga akoksar. Industry indang artist, worker aser technician kongsang balala 32 indang tongtubang tentet ka ama onoki khuret tulu abener aser tang ama tensa tamajungdang timtemba aser Industry nung maparen tenzüksütsü asoshi züngsemtem ajanga onok den ola osang agiteper," ta tenteti ashi.

"Sir, tang ama nüburi timtemba mapang ka nung, anogoshia mapa inyakertem sen aazüktsü aser parnok kibong tem mesütsü atema M&E industry nung maparen tenzüksütsü asoshi onok nem temelaba agüjangma ta onoki mepir. M&E Industry atema alakteta Sorkar ajanga teyuba SOP's aser temzüng ajak nung anidaka onoki maparen tenzüksütsü renema dang lir. FWICE aser Co-ordination Committee nati maparen inyakba tesem shia nung nungdakba mera ajak agia aser crew züngsem ajunga Sorkar ajanga agütsüba temzüng aser tetuyuba tem nung metsüngareta anidaksü molunga dang lir," ta FWICE-i ashi.

"M&E industry nung maparen tarensen agi tenzüksütsü asoshi nai angateta aser onok tebilemba angadanga temelaba agütsütsü imlaa atar," ta kasa shidi nung shia lir.

Australia softball team pur Japan tongogo



Tokyo, Aami/June 01, 2021: Mongolbarnü, Australia national softball team asayatem Tokyo anüdoklen tsütsü Narita, Chiba kübok Narita International Airport tonga arur sülen 'antigen test' atema ataba mapang tangokba noksa ka angur.

Tokyo, Aami/June 01, 2021 (Agencies): Olympics atema Japan tonga arur mezüing athlete tem rongnung Australia indang softball team alitsü. Mongolbarnü (01.06.2021) Australia Softball team pur Japan tonga aruogo.

'Aussie Spirit' ta nüngja agütsüba squad (Australia Softball team) pur den külemi support staff tem Tokyo tezülen Narita airport nung aruagi anen aser airport tongli dang parnok ajak COVID-19 test atema anir ao.

Iba squad nung dena alir ajak vaccine agiogo, saka Australia nungi ayamesoa maodang aser Japan tongli parnok ajak Covid-19 atema test agia liasü. Test agiba den külemi parnok ajak Covid-19 meratem nung anidaka amungtsü.

Iba Games asayatsü mesüra thitsütsü asoshi tebilemstü adokba aser nübür aikati ashishitepa aliba mapang ka nung Australia softball team pur tonga aruba ya asayamung ayongzükertem atema anisüngzük alitsü.

Tokyo densema Japan kübok tesem timbaka "virus state of emergency" nung lir aser Japan nung alir nübür shilem timba kati

iba Games anogo atsülangtsü mesüra thitsütsü molungba poll ajanga sayuogo.

Ajisüaka, asayamung ayongertemi ashiba agi, iba virus dak sendakba tekümdangtsü meratem aser temzüing takang ajanga Games nung shilem agirtem aser nübürtem kümzüka yutsütsü; aser tongtibangsa Olympic Village nung nübür shilem 80 tashi vaccine agütsütsü.

Australia indang softball team-i ashiba agi, item temzüing nung anidaksü asoshi onoki molunga dang lir aser iba wara ajanga saisapong nokdanga arur sülen tanaben iba asaya nung shilem agitsü maongka anguba atema pelar.

Kar (athlete/terepranger) atema, Tokyo 2020 ya Olympic tatembangbuba asütsü akok, kechiyong Paris 2024 nung softball masayatsü.

"Idakji (Tokyo) mapang tera talila amungba den külemi mapang shia COVID test agitsü; aser item inyakyim nung onoki anidaksüsa akümtsü," ta Sydney nungi squad pur ayamesoa aotsü renemba mapang asayar Jade Wall-i ashi.

"Ajisüaka, item ajak nung

arema anidaksü asoshi onoki molunga lir, Japan atongba mapang aser lemzüksüba tesem nung amungba mapang, onok ajak iba wara nungi kümzüka alitsü asoshi onoki akok tashi mera tapet nung anidaksü terenemba lir," ta lai ashi.

Iba airport nungi, team pur indang indanga Ota yimti kübok training tesemi aotsü, koba anüdoklen tip Tokyo nungi kilometer 100 shi pila orr lir.

Athlete tem atema temzüing takang latetja lir, kong parnok adianutem arutsü memelar aser squad den senzüsenbongtsü atema staff züingsem 10 dang melar.

Mejangtsü, chiyongtsü aser gym nung temang anepalutsü atema squad ajunga hotel floor ka nung mungdaksütsü.

"Ballpark-i oa training agitsü mapang nungang parnok anenzükba hotel toktsür aotsü. Australia nung nübür den ajurutepeba ama idakibo parnoki tangar den ajuruteptsü kangarabo maongka mangutsü," ta Softball Australia CEO David Pryles-i ashi.

Ajisüaka, team pur Japan tonga aotsü lenmang ngutetba ya tuluka lir, kechiyong alima ajunga asüngba wara ajanga Olympic sentong nung aiben mepetmesü adokdaksüba den külemi 2020 küm February ita nungi parnok külemi khen danga asayadanga mali," ta David-i ashi.

July 17 nü Olympic Village-i maodang, Australia softball team pur local team balala den asayatsü aser parnok rongnung tetsür (asayar) 15 dang shimtsü.

Australia softball team puri Games ayonger team Japan den July 21, 2021 nü mezüing asayatsü, koba asayamung lapoktsü anogo ana lia asayatsü terenemba lir.

parnok tetuyuba tesashi CONMEBOL nem agütsüogo, kong stadium talila anepalutsüba densema lir.

Colombia nung nübürtem longkak aitba aser lokti mesüngjemeti aliba den Covid-19 tashidak kanga kara prokshia aoba apir iba asayamung anogo melenshitsu asoshi mepeshiba CONMEBOL-i May 20 nü magizük.

Iba sülen asayamung ayongzüka asayatsü atema Argentina kija anung, ajisüaka pollsters Poliarquia-i bushitsügang ka agiba nung shilem agir shilem 70-i iba asayamung ya ayongzüka masayatsüla ta bilemba ngutet.

Bushitsügang nung shilem agir shilem 20-i dang iba asayamung ya Argentine nung asayadaksünü aser shilem 10-i tebilemba tejangja melemsatet.

Asian World Cup qualifiers China nungi Dubai-i belener

Aami/June 01, 2021 (Agencies): China nung COVID-19 dak sendakba nung senzüsenpongtüsü atema tenokdanga tesashi agütsüba ajanga World Cup qualifier asayatem tangaleni belener aotsüsa kümogo. World Cup qualifier ya Suzhou yimti nung iba hopta asayatsü liasü, saka tang United Arab Emirates-i belener aotsü akok.

Maldives aser Syria nung coronavirus tashidak poktetba sülen linük ana national team China tonga aruba sülen quarantine asütsüla ta Chinese Football Association-i Hombarnü tetuyuba agütsü, aser iba ajanga lateta aliba anogo nung asayatem masayatetsüsa aküm.

Iba sülen Asian Football Confederation-i, asayatem China nung masayatsü atema telemtetba agiba sangdong, ajisüaka asayatem kong asayatsü iba indang osang tejangja magütsü.

"Asian Football Confederation-i centralized

Group A asaya tanungbatem China nungi tanga tesem kati belener aotsü telemtetba agiogo, aser taruba anogo ishika tsüingda telemtetba ka agir sangdongtsü."

"China-i aotsü aliba team tem tetsükdaksü aika adokba ajanga iba telemtetba agi. AFC-i tang Chinese Football Association aser neutral venues aser iba asayamung nung shilem agitsü aliba team tem den, stakeholders ajak ajangzüktsü atema inyaktepdar, aser Asian qualifiers takok nung tembangtsü atema bendanga agütsür lir," ta AFC-i ashi.

Maldives aser Syria na 2022 World Cup atema Asian qualifying tanabuba round nung Group A asayatem Suzhou nung asayatsü liasü.

"Asian Football Confederation tetuyuba nung CFA-i, FIFA 2022 World Cup Asian qualifiers Group A nung tanungba asayatem Dubai-i belener aotsü mulunga agizükogo," ta CFA sangdong ka ajanga metetdaksü.

Tokyo Olympics nung Carolina masayatsü



Madrid, Aami/June 01, 2021 (Agencies): Spain nungi Olympic women's singles badminton champion, Carolina Marin temekok yirur aliba ajanga aruya aliba Tokyo Olympics nung lai shilem magitetsü ta osang jangjatsüogo.

Mongolbarnü, Carolina-i iba osang sangokja liasü.

Pungoben tashi European aser aseben tashi world champion, Marin, shibai 2016 küm Rio de Janeiro Games nung India tsür Pusarla Venkata Sindhu tsükdakja gold medal abilen Anterior Cruciate Ligament (ACL) aser meniscus anaprongla raksaa lir.

"Timtem junga asadangshia aser mozüki nung medical nem reprangdaksüba sülen, temekok abilen ACL aser

meniscus anaprongla raksaa aliba putet," ta social media sabang ajanga Carolina-i metetdaksü.

2019 küm January nunga Carolina temekok nung ACL yirua liasü aser iba timtem ajanga September (2019) tashi lai asayamung ka nungdanga shilem magitet.

"Tesüiba ita ana tashi Games atema renemshia aruba mapang kanga timtemogo. Iba asayamung nung onok ajaki shilem agitettsü ta yonya liasü, saka nibo külem team pur den masayatetsüsa akümer aser tejashitsüka lir," ta lai lemsatet.

Training agiba mapang, Carolina temekok kanga mejungi yirua liasü aser ibaji ajanga July 23 nungi tenzüka asayatsü aliba Tokyo Games nungi la tukadokogo.

Argentina nung Copa America masayatsü lemtet

Aami/June 01, 2021 (Agencies): Argentina nung tang tensa apir Copa America football asayamung ayongzüka asayatsü aliba thitsüogo, ta CONMEBOL-i Deobarnü ashi. Argentina nung tang coronavirus tashidak kanga kara menatepyonga aoba mapang ka lir.

CONMEBOL-i taoba hopta Colombia nunga iba asayamung masayatsü telemtetba agiogo, aser ashiba agi, linük kari iba asayamung ayongzüka asayatsü atema benokba asadangdar. "Tang tensa apir Argentina nung Copa America ayongzüka masayatsü telemtetba agiogo," ta CONMEBOL-i tweet asü.

"CONMEBOL-i tanga linüktemi iba asayamung ayongzüka asayatsü atema benokba asadangdar."

Copa America ya taoba küm

asayatsü liasü saka coronavirus wara poktetba ajanga ita 12 thinenata.

Argentine nung Hokolbarnü poll ka nung shilem agirtem timbai iba asayamung ayongzüka masayatsüla ta bilemba ngutetogo, kechiyong linük nung wara kanga sashia pokteter lir.

Copa America tenzüksü hopta ana mejungi lia Argentina anogo teku mokdanga ayutsü telemtetba agiogo aser anogoshia nisung aika dang tashidak potetdar.

Fernandez-i aniba administration-i, May 22 nü nungi linük mokdanga ayuba ajanga iba asayamung atongba mapang tashi nungbo tashidak menatepa aoba jenjang ajemer alitsü ta imlaa liasü.

Argentina-i iba asayamung ayongzüka asayatsü atema

BILEMDANGANG

"Yongpak ka nung yongshilu aika aluyonga, yongküpbo ka dang alir."